

ZORAN MIKULIĆ SASLUŠAN U SIPA ZBOG ZLOUPOTREBE

Ministar osumnjičen u tri istrage

N. HASIĆ

SARAJEVO - Zoran Mikulić, ministar pravde FBiH, saslušan je juče u Državnoj agenciji za istrage i zaštitu (SIPA) kao osumnjičeni za zloupotrebu položaja pri pomilovanju jednog osuđenika, saopšteno je iz ove agencije.

Iz SIPA nisu mogli reći o kojem je o osuđeniku riječ, ali su istakli da je Mikulić juče saslušan po nalogu Tužilaštva BiH koje protiv više osoba vodi istragu zbog zloupotrebe pri donošenju odluka o pomilovanju osuđenih osoba.

Prema dosadašnjoj istrazi, Mikuliću je na teret stavljeno da je urgirao da Komisija za pomilovanje Ministarstva pravde FBiH promijeni svoju prvobitnu odluku i Živku Budimiru, predsjedniku FBiH, ipak predloži pomilovanje Merseada Hadžića zvanog Mirso Švicarac.

Poslije toga, Budimir je prošle godine i pomilovao Merseada Hadžića, osuđenog za pokušaj ubistva, i to tek što je bio počeo izdržavati zatvorsku kaznu.

"Po naredbi Tužilaštva BiH policijski službenici SIPA u okviru rada na predmetu kodnog naziva 'Patriot' u svojstvu osumnjičenog saslušali su ministra pravde Zorana Mikulića na okolnosti njegove uloge u postupku pomilovanja osuđene osobe, a zbog zloupotrebe položaja i ovlaštenja", rekla je Kristina Jozić, policijski



URGENCIJA
Mikulić urgirao da
Komisija Budimiru
predloži pomilovanje
Mirse Švicarca

službenik SIPA.

Poslije jučerašnje potvrde iz SIPA i Tužilaštva BiH da se protiv njega vodi istraga i u slučaju "Budimir", ministar pravde FBiH sada je osumnjičen u tri istrage tužilaštava.

Kantonalno tužilaštvo u Sarajevu odranije protiv Mikulića vodi istragu zbog zloupotrebe položaja pri nabavci narukvica za elektronsko praćenje osuđenika, a Tužilaštvo BiH krajem oktobra otvorilo je istragu protiv njega zbog ometanja rada pravosuđa, jer je samovoljno odlučio premjestiti zaštićenog svjedoka iz sarajevskog u zenički zatvor.

Nakon što je saslušan u SIPA i Tužilaštvu BiH 29. i 30. oktobra, Mikulić je negirao da je prekršio zakon u slučaju premještenja zaštićenog svjedoka i optužio državnog tužioca Durbavka Čmparu da protiv njega, kao kadra SDP-a, vodi političku istragu. Mikulić juče nije htio govoriti o saslušanju u SIPA niti o spornim pomilovanjima. Iz Tužilaštva BiH su saopštili da je istraga o zloupotrebama pri pomilovanjima u završnoj fazi.